



Naã dratu tãdira idi ewaride kãpuriaba jarabada, 15 poada badida. Maãgara obadaa wërakau dyorabada kakua barabarãdaa. Boreguea ðebarãde maã ewarira bavadaa. Maã obadaðeba ëberaãba kawabibadaa dewararãa maã wërakaura poya kima esaida ðesida maã ewarideba nokoðaa. Maã kakaua barabara misa dji papaba ne jumaada idyia jaradiababaria bio bibara ðamarea. Dyi wërã kauba maã bërã nedyu kawa ðabaria, neka kawa ðabaria, nejumaada okawa ðabaria kima edai naena.

Maã ewari jüebarãdaa idyira poya dyiokara ðasia, boro siða erukara ðasia. Maã bërã poya paisa erobakara ðasia. Maã misa maã wërã kaura buða takakarabasia, ðasriðaa ewaride wākara ðasia aba idyi ewari jüebarãdaa. Dyi ewari juëbodode, dji zezaba ëbera tegabadyia. Mabe jarabadyia wãbãdaðe edeeda marea ne juma koði karea bema dyicoda. Wërãraba ne aseada bio waiðaa obadyidaa, bedebema ne aseada ara maã kirãka obadyidaa chinaãgo abadada maã awara chãso ða oregueasida waiðaa obadyidaa maã ðasriðaa ewaride dodi karea.

Maã ewaride pananamarëa dyorarã bio bibara ðeada jarabadyidaa. Maãra dyorarãba trãapanãmisa maã wërã kaua kricha biada jarabadiabadyidaa. Zokea ðamarea, bivara ðamarea, neka kawa ðamarea, wërã biada ðamarea, idyi kimarã bio kirãneba erobamarea. Maã ewaride jumarada bio kirawãrea kipara pãbadyidaa. Maã ewari bapedaðakarea poya piasa oida ðasia. Baribarã maã paisara dyibarirã daude baida ðasia. Bibara baida ðasia, ne o kawa baida ðasia, jãbasida tu cawa baida ðasia, neco tukawa baida ðasia, zagarasida tu cawa baida ðasia. Bio jaraðibarã nejuma okawa baida ðasia maã wërã kaura poya edai karea. Dyibariba unubadyidaa mawã ða umakirãba ãdyi kaura bia mĩga eroðaeda. ãtebarã bio nekai erobaida.